

Broj: 03-02-912/2024
Sarajevo, 07.06.2024. godine

**PARLAMENT FEDERACIJE
BOSNE I HERCEGOVINE**

- **Predstavnički dom -**
gosp. Dragan Mioković, predsjedavajući
- **Dom naroda -**
gosp. Tomislav Martinović, predsjedavajući

Poštovani,

U skladu sa članom IV.B.3.7.c) (III) Ustava Federacije BiH, a u vezi sa odredbama čl. 163, 164. i 165. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i čl. 155, 156. i 157. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20), **radi razmatranja i prihvatanja, dostavljam Vam NACRT ZAKONA O IZMJENAMA ZAKONA O REGISTRACIJI POSLOVNIH SUBJEKATA U FEDERACIJI BOSNE I HERCEGOVINE**, koji je utvrdila Vlada Federacije Bosne i Hercegovine na 35. sjednici, održanoj 05.06.2024. godine.

Nacrt zakona se dostavlja na službenim jezicima i pismima Federacije Bosne i Hercegovine

S poštovanjem,



Prilog u printanoj i elektronskoj formi (CD):

- Nacrt zakona na bosanskom jeziku,
- Odredbe zakona koje se mijenjaju,
- Obrazac 1a,
- Obrazac 2,
- Obrazac IFP-NE i
- Zakon o registraciji poslovnih subjekata u Federaciji Bosne i Hercegovine („Službene novine Federacije BiH“, br. 27/05, 68/05, 43/09, 63/14 i 85/21)

Co: **Federalno ministarstvo pravde**
gosp. Vedran Škobić, ministar

Co: predmet

**BOSNA I HERCEGOVINA
FEDERACIJA BOSNE I HERCEGOVINE
VLADA**

NACRT

**ZAKON
O IZMJENAMA ZAKONA O REGISTRACIJI POSLOVNIH SUBJEKATA U
FEDERACIJI BOSNE I HERCEGOVINE**

Sarajevo, juni 2024. godine

ZAKON O IZMJENAMA ZAKONA O REGISTRACIJI POSLOVNIH SUBJEKATA U FEDERACIJI BOSNE I HERCEGOVINE

Član 1.

U Zakonu o registraciji poslovnih subjekata u Federaciji Bosne i Hercegovine („Službene novine Federacije BiH“, br. 27/05, 68/05, 43/09, 63/14 i 85/21), u članu 13. tačka 8) mijenja se i glasi:

„8) naziv, broj i datum akta o osnivanju subjekta upisa, koji je sačinjen na način propisan zakonom kojim je uređena notarska služba u Federaciji Bosne i Hercegovine.“

Član 2.

U članu 22. stav (1) t. 2) i 3) mijenjaju se i glase:

„2) akt o osnivanju ili akt o izmjenama općih podataka od značaja za pravni promet već osnovanog, odnosno registrovanog subjekta upisa kojim se utvrđuje osnivanje, odnosno izmjena bitnih podataka, sačinjen na način propisan zakonom kojim je uređena notarska služba u Federaciji Bosne i Hercegovine;

„3) statut poslovnog subjekta, sačinjen na način propisan zakonom kojim je uređena notarska služba u Federaciji Bosne i Hercegovine.“

Član 3.

U članu 23. stav (1) t. 2) i 3) mijenjaju se i glase:

„2) akt o osnivanju, sačinjen na način propisan zakonom kojim je uređena notarska služba u Federaciji Bosne i Hercegovine;

„3) statut, sačinjen na način propisan zakonom kojim je uređena notarska služba u Federaciji Bosne i Hercegovine.“

Član 4.

U članu 24. stav (1) t. 2) i 3) mijenjaju se i glase:

„2) akt o osnivanju banke, sačinjen na način propisan zakonom kojim je uređena notarska služba u Federaciji Bosne i Hercegovine;

„3) statut banke, sačinjen na način propisan zakonom kojim je uređena notarska služba u Federaciji Bosne i Hercegovine.“

Član 5.

U članu 25. stav (1) t. 2) i 3) mijenjaju se i glase:

- „2) akt o osnivanju, sačinjen na način propisan zakonom kojim je uređena notarska služba u Federaciji Bosne i Hercegovine;
- „3) statut društva, sačinjen na način propisan zakonom kojim je uređena notarska služba u Federaciji Bosne i Hercegovine.“

Član 6.

U članu 26. stav (1) tačka 2) mijenja se i glasi:

- „2) akt o osnivanju, sačinjen na način propisan zakonom kojim je uređena notarska služba u Federaciji Bosne i Hercegovine.“

Član 7.

U članu 27. tačka 1) mijenja se i glasi:

- „1) akt o osnivanju, sačinjen na način propisan zakonom kojim je uređena notarska služba u Federaciji Bosne i Hercegovine.“

Član 8.

U članu 29. t. 2) i 3) mijenjaju se i glase:

- „2) akt o osnivanju, sačinjen na način propisan zakonom kojim je uređena notarska služba u Federaciji Bosne i Hercegovine;
- „3) statut, sačinjen na način propisan zakonom kojim je uređena notarska služba u Federaciji Bosne i Hercegovine.“

Član 9.

U članu 30. riječi: „notarski obrađen ugovor o osnivanju“, zamjenjuju se riječima:

- „ugovor o osnivanju, sačinjen na način propisan zakonom kojim je uređena notarska služba u Federaciji Bosne i Hercegovine.“

Član 10.

U članu 33. riječi: „notarski obrađen akt o izmjenama i/ili dopunama tih podataka“, zamjenjuju se riječima:

„akt o izmjenama i/ili dopunama tih podataka, sačinjen na način propisan zakonom kojim je uređena notarska služba u Federaciji Bosne i Hercegovine“.

Član 11.

U članu 36. stav (1) mijenja se i glasi:

„(1) Uz prijavu za upis u registar povećanja osnovnoga kapitala društva s ograničenom odgovornošću prilaže se: odluka o povećanju osnovnog kapitala i izmjene osnivačkoga akta, odnosno statuta društva, donesene u skladu sa statutom društva, potvrda banke o uplati uloga, odnosno dokaz o unošenju novih uloga u skladu sa tom odlukom, odnosno, prema potrebi, saglasnost nadležnog organa za sticanje značajnog ili većinskog učešća kapitala. Izmjene osnivačkog akta, odnosno statuta društva, donesene u skladu sa statutom društva, sačinjavaju se na način propisan zakonom kojim je uređena notarska služba u Federaciji Bosne i Hercegovine.“

Član 12.

U članu 38. u st. (1) i (2), riječi: „notarski obrađene izmjene akta o osnivanju“ zamjenjuju se riječima: „sačinjene na način propisan zakonom kojim je uređena notarska služba u Federaciji Bosne i Hercegovine.“

U st. (3) i (4), riječi: „notarski obrađene izmjene i dopune osnivačkog akta odnosno statuta“, zamjenjuju se riječima: „sačinjene na način propisan zakonom kojim je uređena notarska služba u Federaciji Bosne i Hercegovine.“

Član 13.

U članu 39. stav (7), riječi: „notarski obrađene izmjena i/ili dopuna osnivačkog akta“, zamjenjuju se riječima: „sačinjene na način propisan zakonom kojim je uređena notarska služba u Federaciji Bosne i Hercegovine.“

Član 14.

U članu 42. riječi: „notarski obrađeni osnivački akti društava nastalih podjelom“, zamjenjuju se riječima: „sačinjeni na način propisan zakonom kojim je uređena notarska služba u Federaciji Bosne i Hercegovine.“

Član 15.

Ovaj zakon stupa na snagu osmog dana od dana objavljivanja u „Službenim novinama Federacije BiH“.

O B R A Z L O Ž E N J E

NACRTA ZAKONA O IZMJENAMA ZAKONA O REGISTRACIJI POSLOVNIH SUBJEKATA U FEDERACIJI BOSNE I HERCEGOVINE

I. - USTAVNI OSNOV

Ustavno-pravni osnov za donošenje ovog zakona sadržan je u odredbama člana IV. A. 20. (1) d) Ustava Federacije Bosne i Hercegovine. Naime, prema odredbama člana IV. A. 20. (1) d) Ustava Federacije BiH, Parlament Federacije BiH nadležan je za donošenje zakona o vršenju funkcije federalne vlasti, iz čega proizlazi da navedena odredba predstavlja ustavno-pravnu osnovu za njegovo donošenje.

II. - RAZLOZI ZA DONOŠENJE ZAKONA

Ustavni sud Federacije Bosne i Hercegovine donio je dana 06.03.2019. godine Presudu, broj: U-22/16, kojom je utvrđeno da član 29. tačka 2) u dijelu koji glasi: „notarski obrađen“ i tačka 3) u dijelu koji glasi: „notarski utvrđen“ i član 36. stav (1) u dijelu koji glasi: „notarski obrađene“, Zakona o registraciji poslovnih subjekata u Federaciji Bosne i Hercegovine („Službene novine Federacije BiH“, br. 27/05, 68/05, 43/09 i 63/14) nisu u skladu sa Ustavom Federacije Bosne i Hercegovine.

Pored navedenih, neustavnim su proglašene i određene odredbe Zakona o stvarnim pravima („Službene novine Federacije BiH“, br. 66/13 i 100/13), Zakona o zemljišnim knjigama Federacije Bosne i Hercegovine („Službene novine Federacije BiH“, br. 58/02, 19/03 i 54/04), Zakona o nasljeđivanju u Federaciji Bosne i Hercegovine („Službene novine Federacije BiH“, broj: 80/14) i Porodičnog zakona Federacije Bosne i Hercegovine („Službene novine Federacije BiH“, br. 35/05, 41/05 i 31/14), kojima je propisana obavezna notarska obrada za određene pravne poslove.

Donošenju Presude broj: U-22/16 od 06.03.2019. godine prethodilo je donošenje Presude Ustavnog suda Federacije Bosne i Hercegovine broj: U-15/10 od 02.12.2012. godine kojom je, između ostalog, utvrđeno da odredbe člana 73. Zakona o notarima („Službene novine Federacije BiH“, broj: 45/02) kojima je za određene pravne poslove, kao uslov njihove pravne valjanosti, propisana obavezna notarska obrada isprava, što podrazumijeva i osnivačke akte privrednih društava i utvrđivanje njihovih statuta, kao i svaku promjenu statuta privrednog društva, nisu u skladu sa Ustavom Federacije Bosne i Hercegovine.

Ustavni sud Federacije utvrđuje da je Zakon o notarima sistemski zakon, što je pojam općeprihvaćen u pravnoj teoriji, da kao takav sadrži materijalno - pravne i procesno - pravne, te organizacijske norme kojim se na sveobuhvatan način propisuje notarijat u Federaciji Bosne i Hercegovine.

Važeći Zakon o notarima („Službene novine Federacije BiH“, broj: 45/02) u primjeni je od 2007. godine, što je značajan period tokom kojeg su se mogli opservirati pozitivni, ali i negativni efekti primjene ovog zakona. Sa ciljem implementacije presuda Ustavnog suda Federacije Bosne i Hercegovine i unapređenja funkcionisanja notarske službe u Federaciji Bosne i Hercegovine, Federalno ministarstvo pravde pristupilo je pripremi Prednacrtu zakona o notarskoj službi u Federaciji Bosne i Hercegovine kao sistemskog zakona kojim je uređena notarska služba u Federaciji Bosne i Hercegovine.

Suština novog sistemskog zakona kojim se uređuje notarska služba u Federaciji Bosne i Hercegovine, a što se odnosi i na predložene izmjene Zakona o registraciji poslovnih subjekata u Federaciji Bosne i Hercegovine, ogleda se u napuštanju sistema obavezne notarske obrade isprava, odnosno uslovljavanja pravne valjanosti pravnih poslova notarskom obradom isprava na osnovu kojih su ti pravni poslovi zaključeni.

Ustavni sud Federacije Bosne i Hercegovine u Presudi broj: U-22/16 od 06.03.2019. godine rezonira da je propisivanje stroge forme pravnih poslova izuzetak u materiji građanskog i poslovnog (trgovačkog, privrednog) prava, u kojoj općenito dominira princip slobode (autonomije) volje i slobodne dispozicije. Kako takvi pravni poslovi podrazumijevaju disponiranje privatnim pravima, svako ograničenje i otežavanje takvog disponiranja od strane zakonodavca mora biti s najvećom pažnjom odmjereno i nesumnjivo zasnovano na javnom interesu.

Upravo zato, svako propisivanje takvih ograničenja mora da se dovede u vezu s ustavnim i zakonskim garancijama koje stoje na strani građana, odnosno pravnih subjekata i njihove slobodne dispozicije svojim privatnim pravima, ali i s onim garancijama koje stoje na strani zaštite njihove privatnosti uopće. Jer, te garancije zapravo omogućuju da se realizuje jedno od najbitnijih ličnih svojstava (kapaciteta) pravnih subjekata: njihova poslovna sposobnost, kao pravna podloga na kojoj oni, upravo svojom slobodnom voljom, djeluju radi ostvarivanja svojih životnih i poslovnih interesa.

Obavezna notarska obrada isprava više nije pravilo, ona je sada propisana kao izuzetak, i to u onim slučajevima kada pravne poslove zaključuju osobe za koje je, uslijed određenih specifičnih okolnosti, potrebno osigurati viši stepen pravne zaštite: gluha, nijema, gluhonijema stranka koja je pismena, gluha, nijema, gluhonijema stranka koja je nepismena, stranka koja ne poznaje službene jezike u BiH, zatim pravni poslovi koji se odnose na raspolaganje imovinom maloljetnih i poslovno nesposobnih osoba, te kod pravnih poslova kojima se obećava neka činidba kao dar, s tim što se nedostatak notarske forme, u ovom slučaju, nadomješta izvršenjem obećane činidbe, kao i prilikom zaključenja ugovora o doživotnom izdržavanju, ugovora o ustupanju i raspodjeli imovine za života i ugovora o odricanju od naslijeđa koje nije otvoreno.

U slučajevima u kojima zakonom kojim se uređuje notarska služba u Federaciji Bosne i Hercegovine nije propisana obavezna notarska obrada isprava, pristup pravnim uslugama je liberalizovan, te poslovnim subjektima stoje na raspolaganju različiti modaliteti ovjere osnivačkih akata, statuta i njihovih naknadnih izmjena. Notarska obrada osnivačkih akata i statuta i dalje je moguća, ali predstavlja fakultativnu opciju. Zainteresovanim poslovnim subjektima stoji na raspolaganju i opcija notarske potvrde – solemnizacije osnivačkog akta i statuta, čime oni stječu pravnu snagu javne isprave, a moguća je i ovjera potpisa ovlaštenih osoba u kojem slučaju isprava neće imati svojstvo javne isprave, ali je podobna za upis u javne knjige, u ovom slučaju Registar poslovnih subjekata.

Predloženim pravnim rješenjima kojima se liberalizira tržište pravnih usluga (i) u domenu sačinjavanja osnivačkih akata i statuta poslovnih subjekata vrši se implementacija Presude U-10/15 od 02.12.2015. godine kojom je utvrđeno da je sistem obavezne notarske obrade isprava diskriminatoran i na štetu drugih osoba - diplomiranih pravnika sa položenim pravosudnim ispitom, koji posjeduju sposobnosti i moralne kompetencije, te su osposobljeni za pružanje istih ili sličnih usluga, što ga čini protivnim ustavnim garancijama uživanja najviše razine međunarodno priznatih prava i sloboda iz člana II. 2. i jednakosti pred zakonom iz člana II. 2. 1. c) Ustava Federacije Bosne i Hercegovine.

III. - USKLAĐENOST PROPISA S EVROPSKIM ZAKONODAVSTVOM

Prilikom izrade ovog Nacrta, Federalno ministarstvo pravde je imalo u vidu Uredbu o Uredu Vlade Federacije BiH za zakonodavstvo i usklađenost s propisima Evropske unije („Službene novine Federacije BiH“, br. 26/20 i 76/20) i Uredbu o postupku usklađivanja zakonodavstva Federacije BiH s pravnom stečevinom Evropske unije („Službene novine Federacije BiH“, broj: 98/16) i u tom smislu je izvršilo analizu evropske pravne stečevine. Nakon detaljne i sveobuhvatne analize, zaključeno je da ne postoje primarni niti sekundarni izvori evropskog prava koji regulišu predmetnu materiju, te obrađivač ovog propisa nije u mogućnosti dostaviti tablicu usklađenosti.

IV. - OBRAZLOŽENJE PREDLOŽENIH ZAKONSKIH RJEŠENJA

Presudom Ustavnog suda Federacije BiH U-22/16 od 06.03.2019. godine utvrđeno je da odredbe Zakona o registraciji poslovnih subjekata u Federaciji Bosne i Hercegovine („Službene novine Federacije BiH“, br. 27/05, 68/05, 43/09, 63/14 i 85/21) i to član 29. tačka 2) u dijelu koji glasi: „notarski obrađen“ i tačka 3) u dijelu koji glasi: „notarski utvrđen“ i član 36. stav (1) u dijelu koji glasi: „notarski obrađene“, nisu u skladu sa Ustavom Federacije Bosne i Hercegovine. Ustavni sud Federacije Bosne i Hercegovine nadalje u obrazloženju Presude navodi kako je Zakon o notarima sistemski zakon sa kojim drugi zakoni, u skladu sa principom vladavine prava, moraju biti usaglašeni. Ocjena ustavnosti je, zbog proceduralnih pravila po kojima postupa Ustavni sud Federacije BiH, izvršena samo u odnosu na one odredbe koje su

obuhvaćene zahtjevom za ocjenu ustavnosti, ali postoje i druge odredbe (Zakona o registraciji poslovnih subjekata u Federaciji Bosne i Hercegovine) koje sadrže identična rješenja o kojima se razmatralo prilikom ocjene ustavnosti.

Slijedom navedenog, izmjene Zakona o registraciji poslovnih subjekata u Federaciji Bosne i Hercegovine samo u dijelu koji je proglašen neustavnim u praktičnoj primjeni bi izazvale veliku pravnu nesigurnost, te predloženi Nacrt sadrži opsežnije intervencije u tekst važećeg Zakona o registraciji poslovnih subjekata u Federaciji Bosne i Hercegovine, na način da su predložene izmjene odredbi svih onih članova koje sadrže terminološku odrednicu „notarski obrađeni“ i „notarski utvrđeni“ (osnivački akt i/ili statut poslovnog subjekta).

Konkretno, Nacrtom se predlažu izmjene člana 13. tačka 8), člana 22. stav (1) t. 2) i 3), člana 23. stav (1) t. 2) i 3), člana 24. stav (1) t. 2) i 3), člana 25. stav (1) t. 2) i 3), člana 26. stav (1) tačka 2), člana 27. tačka 1), člana 29. t. 2) i 3), člana 30., člana 33., člana 36. stav (1), člana 38., člana 39. stav (7) i člana 42. na način da se umjesto obavezne notarske obrade osnivačkog akta, statuta i izmjena statuta poslovnih, sada upućuje na primjenu relevantnih odredbi (budućeg) Zakona o notarskoj službi u Federaciji Bosne i Hercegovine kojima su propisani ranije opisani fakultativni modaliteti notarske obrade isprava, notarske potvrde privatnih isprava – solemnizacije i notarske ovjere potpisa ovlaštenih osoba na privatnim ispravama.

V. - FINANSIJSKA SREDSTVA

Za provođenje ovog zakona nije potrebno osigurati dodatna sredstva u budžetu Federacije Bosne i Hercegovine.

Odredbe Zakona koje se mijenjaju:

**Član 13.
(Opći podaci)**

Opći podaci o poslovnim subjektima koje mjerodavni registarski sud unosi u glavnu knjigu registra su:

- 1) firma i sjedište, odnosno ime, prezime i prebivalište (svih) osnivača/vlasnika subjekta upisa;
- 2) predmet upisa;
- 3) datum, dan i sat prijema prijave za upis;
- 4) firma i sjedište subjekta upisa;
- 5) skraćena oznaka firme subjekta upisa;
- 6) MBS te porezni identifikacijski broj;
- 7) oblik subjekta upisa;
- 8) naziv, broj i datum notarski obrađenog akta o osnivanju subjekta upisa;
- 9) ime, prezime i položaj ovlaštenog predstavnika/zastupnika subjekta upisa;
- 10) obim ovlaštenja ovlaštenoga predstavnika/zastupnika subjekta upisa;
- 11) visina ugovorenog (upisanog) osnovnoga kapitala;
- 12) visina uplaćenog kapitala u novcu;
- 13) vrijednost kapitala u stvarima i pravima;
- 14) procentualno sudjelovanje pojedinačnog osnivača u kapitalu subjekta upisa (u novcu, pravima i stvarima);
- 15) djelatnost subjekta upisa sa šiframa odjeljaka djelatnosti predviđenim važećom klasifikacijom djelatnosti.

**Član 22.
(Registarske isprave)**

(1) Za potrebe utvrđivanja i provjere općih i posebnih podataka koji se prilikom osnivanja poslovnog subjekta ili izmjena podataka od značaja za pravni promet obavezno unose u registar, u zavisnosti od predmeta upisa, registarski sud zahtijevat će podnošenje sljedećih isprava:

- 1) ovjeren potpis lica ovlaštenog za zastupanje na obrascu prijave za registraciju predviđenom za sud u tiskanom obliku;
- 2) notarski obrađeni akt o osnivanju ili akt o izmjenama općih podataka od značaja za pravni promet već osnovanog, odnosno registriranog subjekta upisa kojim se utvrđuje osnivanje, odnosno izmjena bitnih podataka;
- 3) notarski utvrđen statut poslovnog subjekta;

- 4) odluku o imenovanju lica ovlaštenog za zastupanje u unutrašnjem i vanjskotrgovinskom prometu, ako nije imenovano aktom o osnivanju;
 - 5) potvrdu banke o izvršenoj uplati na privremeni račun deponiranih novčanih uloga kojom se utvrđuje visina uplaćenog kapitala u novcu;
 - 6) dokaz o sredstvima osiguranja za neuplaćeni iznos novčanog dijela osnivačkog uloga kod jednočlanog društva kapitala;
 - 7) izvod iz odgovarajućeg javnog registra kojim se dokazuje vlasništvo lica koje unosi ulog u stvarima i pravima i nalaz ovlaštenog sudskog vještaka kojim se utvrđuje vrijednost uloga u stvarima i pravima;
 - 8) odgovarajuće odobrenje Komisije za vrijednosne papire Federacije Bosne i Hercegovine (u daljnjem tekstu: Komisija za vrijednosne papire) i Registra vrijednosnih papira Federacije Bosne i Hercegovine (u daljnjem tekstu: Registar vrijednosnih papira) ukoliko je to propisano posebnim zakonom;
 - 9) dokaz o sredstvima osiguranja za neuneseni dio nenovčanog uloga kod jednočlanog društva kapitala;
 - 10) odobrenje nadležnog organa u skladu sa članom 46. ovog zakona.
- (2) Odredbe stava (1) tačke 1) ovog člana primjenjuju se kod upisa osnivanja svih oblika privrednih društava, kao i kod upisa promjene podataka koji se tim ispravama dokazuju, osim ako je njihova primjena izričito isključena ovim zakonom.

Član 23.

(Isprave potrebne za upis osnivanja dioničkoga društva)

(1) Uz prijavu za upis osnivanja dioničkog društva pored ostalih podnose se i sljedeće isprave:

- 1) isprave propisane članom 22. stav (1) tačka 1) ovog zakona;
- 2) notarski obrađen akt o osnivanju;
- 3) notarski utvrđen statut;
- 4) odobrenje nadležnih organa iz člana 22. stav (1) tačka 8) ovog zakona ako je posebnim propisom predviđeno;
- 5) isprave propisane članom 22. stav (1) tačka 9) ovog zakona;
- 6) potvrda banke o uplati osnivačkog kapitala u novcu, odnosno dokaz o novčanoj vrijednosti stvari i prava unesenih u društvo;
- 7) odluka o imenovanju lica ovlaštenog za zastupanje ako nije imenovano aktom o osnivanju;
- 8) ovjeren potpis lica ovlaštenog za zastupanje.

(2) U slučaju sukcesivnog osnivanja dioničkoga društva, subjekt upisa podnijet će i dokaz o objavi javnoga poziva za upis i uplatu dionica, odnosno prospekt s odobrenjem prospekta od nadležnog organa.

(3) Uz prijavu za upis u registar jednočlanoga dioničkog društva, pored isprava iz stava (1) ovoga člana, prilaže se dokaz o sredstvima osiguranja za neuplaćeni iznos novčanoga dijela osnivačkoga uloga, odnosno za vrijednost neunijetoga nenovčanog uloga.

(4) U registar se upisuju osnivači dioničkoga društva.

Član 24.

(Isprave potrebne za upis osnivanja banke ili druge finansijske organizacije)

(1) Uz prijavu za upis u registar osnivanja banke ili druge finansijske organizacije, pored ostalih, podnose se i sljedeće isprave:

- 1) isprave propisane članom 22. stav (1) tačka 1) ovog zakona;
- 2) notarski obrađen akt o osnivanju banke;
- 3) notarski utvrđen statut banke;
- 4) rješenje Agencije za bankarstvo Federacije Bosne i Hercegovine (u daljnjem tekstu: Agencija za bankarstvo) o izdavanju dozvole za rad, kao i suglasnost na akt o osnivanju i statut, odnosno isprave predviđene drugim zakonima Federacije;
- 5) dokaz o uplati novčanih sredstava na privremeni račun kod banke;
- 6) akt o imenovanju direktora ili vršioca dužnosti direktora;
- 7) ovjeren potpis lica ovlaštenog za zastupanje;
- 8) dokaz da su osnivači banke sredstva u nenovčanom obliku stavili na raspolaganje banci.

(2) Na upis u registar podružnice ili poslovne jedinice banke shodno se primjenjuju odredbe člana 15. ovoga Zakona;

(3) Na upis u registar štedionica, štedno-kreditnih organizacija i štedno-kreditnih zadruga shodno se primjenjuju odredbe stava (1) ovoga člana.

Član 25.

(Isprave potrebne za upis osnivanja dioničkoga društva za osiguranje)

(1) Uz prijavu za upis u sudski registar osnivanja dioničkog društva za osiguranje prilažu se:

- 1) isprave propisane članom 22. stav (1) tačka 1) ovog zakona;
- 2) notarski obrađen akt o osnivanju;
- 3) notarski utvrđen statut društva;
- 4) dozvola nadležnog organa za rad društva, odnosno druge isprave propisane drugim zakonom Federacije;
- 5) akt o imenovanju direktora ili vršioca dužnosti direktora;
- 6) ovjeren potpis lica ovlaštenog za zastupanje;
- 7) dokaz o deponiranim novčanim sredstvima na privremeni račun;
- 8) dokaz o ulozima u stvarima i pravima.

(2) Na upis u registar podružnice ili poslovne jedinice dioničkoga društva za osiguranje shodno se primjenjuju odredbe člana 15. ovoga Zakona;

(3) Uz prijavu za upis u registar osnivanja društva za uzajamno osiguranje shodno se primjenjuju odredbe stava (1) ovoga člana;

(4) Uz prijavu za upis u registar osnivanja agencije za poslove pružanja drugih usluga u osiguranju prilažu se isprave koje se odnose na upis dioničkog, odnosno društva s ograničenom odgovornošću, kao i dozvola nadležnog organa za rad te agencije.

Član 26.

(Isprave potrebne za upis osnivanja društva s ograničenom odgovornošću)

(1) Uz prijavu za upis u registar osnivanja društva sa ograničenom odgovornošću prilažu se sljedeće isprave:

- 1) isprave propisane članom 22. stav (1) tačka 1) ovog zakona;
- 2) notarski obrađen akt o osnivanju;
- 3) potvrda banke o izvršenoj uplati kapitala u novcu, odnosno dokaz o novčanoj vrijednosti stvari i prava unesenih u društvo;
- 4) odluka o imenovanju lica ovlaštenog za zastupanje ukoliko nije imenovano aktom o osnivanju;
- 5) ovjeren potpis lica ovlaštenog za zastupanje.

(2) Uz prijavu za upis u registar osnivanja jednočlanoga društva s ograničenom odgovornošću, uz isprave iz stava (1) ovoga člana, prilaže se i dokaz o sredstvima osiguranja za neuplaćeni iznos novčanoga dijela osnivačkoga uloga, odnosno za vrijednost neunijetoga nenovčanog udjela.

Član 27.

(Isprave potrebne za upis osnivanja društva s neograničenom solidarnom odgovornošću i komanditnog društva)

Uz prijavu za upis u registar osnivanja društva s neograničenom solidarnom odgovornošću i komanditnog društva prilažu se sljedeće isprave:

- 1) notarski obrađen akt o osnivanju;
- 2) potvrda banke o uplati novčanoga uloga na privremeni račun, odnosno dokaz o tome da su stvari i prava stavljene na raspolaganje društvu ukoliko je predviđena uplata novca, odnosno unošenje stvari i prava u društvo aktom o osnivanju i
- 3) ovjereni potpis osobe ovlaštene za zastupanje.

Član 29.

(Isprave potrebne za upis u sudski registar osnivanja preduzeća koje ima javna ovlaštenja)

Uz prijavu za upis u sudski registar osnivanja preduzeća koje ima javna ovlaštenja prilažu se:

- 1) isprave utvrđene članom 22. stav (1) tačka 1) ovoga Zakona;
- 2) notarski obrađen akt o osnivanju;
- 3) notarski utvrđen statut;
- 4) dokaz o iznosu sredstava za osnivanje i početak rada preduzeća, odnosno dokaz da su stvari i prava koja se unose u preduzeće predana na raspolaganje preduzeću;
- 5) odluka o imenovanju direktora ili vršioca dužnosti direktora ako nije imenovan aktom o osnivanju i ovjereni potpis;
- 6) akt nadležnog organa o davanju javnih ovlaštenja preduzeću;

7) akt nadležnog organa da preduzeće koje ima javna ovlaštenja ispunjava propisane uslove za obavljanje poslova, ako je to predviđeno posebnim zakonom.

Član 30.

(Isprave potrebne za upis u sudski registar osnivanja poslovnog udruženja)

Uz prijavu za upis u registar osnivanja poslovnog udruženja prilaže se: notarski obrađen ugovor o osnivanju, dokaz o uplati osnovnoga kapitala u novcu, kao i dokaz o stavljanju stvari i prava na raspolaganje poslovnom udruženju u skladu sa ugovorom, odluka o imenovanju zastupnika poslovnog udruženja i ovjereni potpis zastupnika poslovnog udruženja.

Član 33.

(Isprave potrebne za upis promjena podataka od značaja za pravni promet)

Kod upisa promjena podataka od značaja za pravni promet kao što su: promjena firme, sjedišta subjekta upisa, djelatnosti subjekta upisa, lica ovlaštena za zastupanje, promjene osnivača i drugih promjena u registar se dostavlja notarski obrađen akt o izmjenama i/ili dopunama tih podataka.

Član 36.

(Isprave potrebne za upis u registar povećanja odnosno smanjenja osnovnog kapitala društva sa ograničenom odgovornošću)

(1) Uz prijavu za upis u registar povećanja osnovnog kapitala društva sa ograničenom odgovornošću prilaže se: odluka o povećanju osnovnog kapitala i notarski obrađene izmjene osnivačkog akta, odnosno statuta društva, donesene u skladu sa statutom društva, potvrda banke o uplati uloga, odnosno dokaz o unošenju novih uloga saglasno toj odluci, odnosno, prema potrebi, saglasnost nadležnog organa za sticanje značajnog ili većinskog učešća kapitala;

(2) Uz prijavu za upis smanjenja osnovnog kapitala društva sa ograničenom odgovornošću prilaže se odluka o smanjenju kapitala društva, kao i dokaz da su povjerioci subjekta upisa obaviješteni o namjeravanom smanjenju kapitala.

Član 38.

(Isprave potrebne za upis pristupanja novog člana odnosno prestanak članstva)

(1) Uz prijavu za upis u registar pristupanja novog člana društva sa neograničenom solidarnom odgovornošću prilažu se notarski obrađene izmjene akta o osnivanju;

(2) Uz prijavu za upis prestanka članskog odnosa u društvu sa neograničenom solidarnom odgovornošću prilaže se isprava kojom se dokazuje osnov prestanka članskog odnosa i notarski obrađene izmjene akta o osnivanju;

(3) Uz prijavu za upis u registar pristupanja novog člana komanditnog društva i društva sa ograničenom odgovornošću prilaže se odluka organa upravljanja subjekta

upisa, odnosno ugovor o prijenosu udjela kao i notarski obrađene izmjene i dopune osnivačkog akta odnosno statuta;

(4) Uz prijavu za upis prestanka članskog odnosa u komanditnom društvu i društvu sa ograničenom odgovornošću prilaže se isprava kojom se dokazuje osnov prestanka članskog odnosa i notarski obrađene izmjene i dopune osnivačkog akta odnosno statuta.

Član 39.

(Isprave potrebne za upis promjena podataka od značenja za pravni promet)

(1) Uz prijavu za upis u registar promjene firme prilaže se odluka o promjeni firme;

(2) Uz prijavu za upis u registar promjene sjedišta subjekta upisa prilaže se odluka o promjeni sjedišta subjekta upisa;

(3) Uz prijavu za upis promjene djelatnosti subjekta upisa prilaže se odluka o promjeni djelatnosti i odobrenje nadležnog organa, ako je to propisano posebnim zakonom;

(4) Uz prijavu za upis u registar promjene odgovornosti subjekta upisa za obaveze drugih subjekata upisa u pravnome prometu prilaže se ugovor, odnosno njegove izmjene;

(5) Uz prijavu za upis promjene lica ovlaštenog za zastupanje subjekta upisa prilaže se odluka nadležnog organa subjekta upisa kojom je jedno lice razriješeno, odnosno kojom tom licu prestaje pravo zastupanja, a drugo lice imenovano, odnosno ovlašteno za zastupanje, kao i obim ovlaštenja tog lica i ovjereni potpis tog lica;

(6) Uz prijavu za upis u registar promjene osnivača ili uvećanja odnosno smanjenja broja osnivača ili promjene osnivačkoga udjela prilaže se ugovor, odnosno odluka o promjeni osnivača odnosno udjela;

(7) Ukoliko se promjene iz ovog člana vrše izmjenama osnivačkog akta, uz prijavu za upis promjena u registar prilaže se notarski obrađena izmjena i/ili dopuna osnivačkog akta.

Član 42.

(Isprave potrebne za upis u registar podjele poslovnih subjekata)

Uz prijavu za upis novih poslovnih subjekata nastalih podjelom prilaže se odluka skupštine o podjeli poslovnog subjekta i diobni bilans odobren od skupštine, te notarski obrađen osnivački akti društva nastalih podjelom.